

泊水齋詩

山書齋



(二)

洵水新譜

上
古
書



卷一

泊水齋詩鈔卷一

山右叢書初編

金銘 張慎言 著

虎谷詩集

長安送王孝橫歸里

送客出門去歸仍返敝廬尊餘殘醉酒案積閱時書豈但嗟幽獨還愁苦淖淤
蕭蕭前夜月寂寞到堦除

又

長安爲客久那更送歸人況復清秋日其如多病身好尋前社友爲問故園春
倘及余新況詩朋暨酒隣

都下別楊季雨時季雨初第

念君方釋褐而我正歸山出處譚何易悲懽語且刪交情無貴賤懷抱閱喧閒
後此煩珍重羶途畏路間

又

去住人生何可期歌驪詎料在於斯訂交投分非今日解組彈冠此一時宦味
頗從濃淡歷畏途慎作淺深思看君鼎實方其始嶺首雲霞我所私

右邵中齋詩偶於友

人扇頭見之附錄

初得虎谷取次經營

泉石在襟帶今年却始知得來藜杖下喜在東山陲日往未云倦人看亦曰奇
林泉作迂事眠食免喧卑微路取曲折幽芳著委垂桃蹊與竹徑高下以參差
馴黼澄芳沼邀鶯選靜枝爽兼幽乃可臺倚月方宜謝石相撐映亭林須蔽虧
有岡欣凸凹無水不玄之好客歌吟石當壚戲酒旗何妨畦菜甲亦且插花籬
激水成幽響多松爲靜吹高軒額賢已文檻欸南漪歷歷如在眼娟娟知幾時
水窮雲起處香遠客來期樂事縣相待悠悠勞我思

菌閣

幽爽果難兼茲亭良偶然戲酬唯岫壑吐納盡溪烟石險傾還捍泉寒清且涓
春秋風日好登眺問誰偏

種松

我種青松如我長安能立拔十丈強靈晦會將起風雨霜皮冷翠搖蒼涼笑似
老翁生稚子稚子老翁俱沒齒情知稚子不相待學語弄髯差可喜我今種松
頗似此蓋偃濤翻吾老矣

泉側種松

潺湲如此地安可側無松將無辜好月何以憩流淙寂寞生諸響蒼涼肅衆容
奈非旦莫事痴想但胸春

除日種松

今日是除日臨除仍種松春來泉脉活陽燁土膏鬆辭舊風兼雪遷心壑對峰
來年三四月細細拔青茸

漱酣亭雨後

谷委風能曲泉幽暑頗除
草蛟欺袒裼遊蟻過攤書
鳥鬪不避我雲閒時起予
朝來有驟雨自往理階渠

泉側

海懷但寥闊岳想亦徒然
憩我如卷石臨余一勺泉
袖書當返照短詠答蒼煙
所懷年將莫新松纔及肩

晴月

春月易窗薄今宵月頗明
花噴香作靄雨乍霽爲清
竹露繁可掇林棲驚有聲
遲明休盥櫛夙往瞰朝英

旭牕

朝瞰臨戶牖清旭政宜人
几硯繁如水圖書香可親
人方盥櫛已梅雨夢紉勻
淵默坐良久勞勞媿此身

偶成

我住此村古清溪帶磧田富貧無甚異瓜葛但依然山取虎名谷

虎谷名松疑漢

以前

岳廟松甚古

居平相爾汝風俗賴能賢

虎谷小築

凡百聊復爾爲園亦不貪好花隨部種名釀借方譜香欲團爲國紅成陣若酣此中招靜友聽鳥嚼黃柑

又

地僻喧雖遠園荒雜未除作亭何必廣取徑不妨迂桐影青堪掬松濤響不居香光聲氣裨聊以讀吾書

臘廿六日散步小園

後二日立春

去春纔二日輕煥已春先聽鳥聲將軟看雲影欲妍冬情久似蟄喧想遂如煙韻事多迂闊躊躇開歲前

春首督渠因書所見

春來鳥鵲鳴相呼爭覓鰕鱗啄敗蒲水腹漸柔泉脉活荇芽抽綠蟹方蘇石稜
仍漬苔痕淺委葉壅將新湍逋南畝余今看淑載手親畚鍤試渠初

北郊看桃花是日薄陰

上巳之
明日

輕陰閣微雨是日養花天夜旣胎新露朝仍浴淡煙枝還臨水側楔卽在花前
連日喜無客孤遊亦賞妍

首夏雨後新池成是日黃鳥來同廬山人賦

滂沱溪遂沒山根宛轉渠方來遠村夢入新淙疑別浦曉看細溜刻初痕波虛
乍織林文幻竹靜深吞水氣昏却好流鶯今日到何妨再洗對花樽

六月七日夜晴坐

初月娟娟墮草堂新晴檻外但幽涼星垂小閣疎能照柳拂高雲影易蒼風靜
野將橫薄靄園虛竹亦引微香更誰消息聲光裡祇見青青夜未央

同楊季雨諸兄集開明寺

友朋文酒豈徒然丘壑於人亦有緣近我寺能饒水木與君村接一風煙偶然
小集無賓主率爾相招誰後先縱判春光容易去泉聲無恙只涓涓

題兒履旋畫

宿緣原自關山水豈復如今煩腕指神明原在筆之先一草一木皆情理遲迴
近遠澹濃間意匠經營商起止胸中所有筆寫之若合若離良有以任爾盤礴
不爾禁性情所近姑賢已畫理原與詩文通觸類關生從此始

松濤閣宵坐

宵霽流波靜不喧森海衆象紛一園花顛搖露香光幻木末來涼聲影繁灘響
能令羣籟寂烟疏未禁好風翻星辰照我稀可數緬感來今誰與言

曹邱署中

安往非貧賤何爲乞向人宦情甘爾汝畏路失青春我作可憐態誰爲受媚人

洋方齋詩金 卷一
愛人還自愛吾道實堪珍

郎中有懷故園

兩歲如在里栽松父百株襟情相澹漠老稚各蕭疎丘壑應無恙主人懷所居
山田百畝糞自許上農夫

候月

月魄載生過下弦時時深坐爲遲眠喜逢纖影流霞外坐待孤光橫斗前澹意
與之俱靜遠喧人何以答幽娟更誰肯至三更後缺月徘徊真可憐

再往北郊看花時方杜門謝客

客來辭以病此病中膏盲政爾衡門閉其如春草芳燕能搖軟碧蝶亦飲初香
不可因辭客花潭負夕陽

上巳集雙溪

年來屢擬理花潭共撰良辰此月三新渠乍引香之遠纖月纔流酒政酣盧讓

小鬟呼作采紅辭重碧釀爲嵐雙溪遙夾桃花巷定此誅茅卓半菴

同馬伏九諸兄集開明寺看隔水桃花

林含曉露明初噉溪醺青苔縈遠村度水花憐光不溼浮煙岸覺漲新痕斷霞未斂雲將雨薄藹纔收月在門半日霽陰殊恍惚細研通景索追論

飲桃花塢時花將落

花落未須惜半留花在枝細歌縈墮蕊薄莫養餘姿能點苔文好猶勝樹杪時躊躇緬今昔詎止落花悲

午日荷陂

橋上佳人橋下蓮綠荷紅袖兩爭研佳人祇自驕春色不是無情惱少年

夏夜月坐

素月徐流暑漸殘非關夜色高雲闌影過河漢星皆冷澹入溪流聲亦寒樓閣果能銜莫景瀟湘真似在闌干坐來忽掛疎林外又作峯頭初吐看

苦荒

家口煩朝夕參差半井田一年常苦旱三黨不微霽童僕指累百牛羊角未千
眼看場圃畢倉廩竟蕭然

悼鶴

寥闊雲海姿居然依我廬爾體潔以遠神亦與之俱豈不謀朝夕飲啄間有餘
戢爾萬里翮矯首如愁胡常傍君子前意密而體疎陰陽不能賊抱丹如頂朱
秋氣愛明遠行散乃郊墟胡爲不自保喪爾煙霞軀我在子敢死嗟哉亦何愚
中散不偶世文舉調亦孤正平雖霞舉狂躁非吾徒爾與三君子是非果焉如
遇矣古明哲野望空躊躇

山居所構木石居成久之纔一過

曾勞山色照柴門衣帶清溪非近源數笏未常煩木石諸妍遂不集雲根林亭
金始相幽緬昏旦方能自寂喧寥闊幾回虛展覲春來纔枉一相存

新正三日山中步月

幾度欲來空展期
今來恰好月生時
斜光不敵溪煙重
寒影輕辭岫色欹
籬黑大疑驚虎遁
山深鬼亦覩人嬉
連宵無事容深坐
月墮疎林當稍遲

山中對月留憩殆十日許

月魄今宵皓已盈
初來纔是月哉生
幽娟竟夕消纖滿
淵寂經旬同臞明
時有好風開晚氣
恒無剝啄擾孤清
擬看吐月深更後
他緒牽余悵已行

課畊

時烏奏懽弄蘋藻
亦含榮土膏遂如泛
春氣憤已盈
隴行如踏雪履跡一何深
披靡沒犁面牛力頗易陳
烏雅羣噪聒螻蛄不皇寧
物化固如此悲喜遂交并
沉吟我良友聊用觀吾生

晦夜看積雪

殘雪照深夜星辰高且寒
幽光起林色澹韻動波瀾
竹裡暗逾白庭陰明欲乾

方塘如積水又想月將殘

雪晴步月

雪月豈但清在膚空明疑似澹皆無風先有約園生暈霽後流波光遂孤委素在園爭欲動餘清與鶴靜相娛寒林倒影鈿嬋下笑我生如集木鳥

讀詩卽事

居家寡懽趣百慮何相煎既念禾黍好常期子弟賢詩書珍雅節風雨愧倉天惆悵鵲鴿咏呻吟棠棣篇斜暉憐薄莫瑤草度芳年博奕賢姑已驕游性所便鶯花分日賞童冠集春妍善謔忘兄弟酣呼失後前懽嫌十日少愁起一朝偏怒喜胡難測亭橋輒屢遷當壚恒繼火卜夜不曾眠苦欲分其過欣聞久自悛微諷借盃酒諧語博歡顏暗裡眉空蹙逢時笑且先豈云徒僞喜不敢有微悵萬一能珍重初終頗曲全觀橋爲梓道借友作慈先弱息倘如此單身奚賴焉望隨疑轉劇媿與懼相緣不飲茱萸酒惟耽桃李煙松揪荒可哭藥餌慢堪憐

君罔思三益余將覩九泉遐哉今昔事鬱塞不能宣

虎谷雜詠有泉欣迂可來之句因賦

泉源在左沼在右中間澗仄石嶽崎今看倒影雲難靜試問清源人未知渠未
鑿時幽欲訴波方渟止澹爲漪拳山勺水何關係如此因緣靜者期

同楊沁湄王孝橫集樊山最高處分樊字

往時但見白雲樊是日登臨秋滿原山疊層嵐非一貌霞明細水帶多村暄寒
頃刻更單袷晴雨紛紜異旦昏爲祝諸君休再醉詰朝清櫛看朝曦

龍泉寺獨夜聽泉

清泉非一響高下若相酬雜以風將莫兼之竹逾秋坐令諸想淨燈與一龕幽
耳往聲來處眞如容自求

東臯待月

時被劾
待罪

涼宵有佳候氣象紛可求歛月白如昨殘煙青未收興來疑有贈情往若爲酬

光響雖非一蕭然總一秋

又

草蟲與寒澗薄莫各爭秋
愁容寂以聽幽懷冥自酬
頽輪明側嶺晚氣晦孤州
獨坐誰與語星河澹自流

又

待月月未出孤懷有所憑
青天能問否積靄可披曾
夜久色難定林開煙欲騰
坐深仍陟嶺遠氣暗峰棱

又

松靜露成響峰高月稍遲
青仍橫別浦白已半西陂
待月情何似懷人感在斯
朗然照我獨悲喜集茲時

虎谷漫成

桐雨夜離離晨光溼欲曦
將雛鴉自喜延頸鶴相思
竹粉青相倚牀書懶不披

天涯同病者棄我實如遺

又

此身安所用眠食不須調苟且隨鄉黨支吾度莫朝詩書眞土苴林石負雲椒
伏枕餘何事幽居守寂寥

丙午早秋

生事蒼茫渾欲愁淒然四序但周流千峰白已迎霜雁一葉紅先報早秋身在
家園如作客情同懷土強登樓天涯朋友都安在今古悠悠誰與謀

秋仲

孤緒幽懷恒不堅祇隨節物作懽憐林疏寂歷餘悲籟峰遠森沈但積煙失侶
孤雲橫雁外書空何字結霜前蒼蒼果否爲眞色搔首踟躕問彼天